

1 Tesalonaika

Okoro buk nukan onoktapau

Jisas ko meienuk, woisan 20 orip manonuk, Pol ko Tesalonaika mena Jisas nukan ämän tamare rawonus, Korin mena pote rawon. Ko kiro opok raunuk raunuk, Timoti nukas pote keser auruwon, “Tesalonaika menan roasiret akan woiaka Jisas mesin epar moin akan onok eposek, utianik, karauk Juda roat akas ak pak iwäi maroi.” Pol ko kiro ämän roumoi, kiro pakan Kristen roasiret woiaka sakau maraun jer we marowon. Ko akan woiaka epar moin keseriar sakau me rauna, Jisas ko ätäi kowai rai awarowon.

Okoro buk tainoraun ämän

1:1 Pol nukas Tesalonaika roasiret woiaka eraun ämän awarowon.

1:2–3:13 Kiro roasiret akan woiaka Jisas mesin epar moin kiro sakau me rauna, Pol ko kiro ämän roumoi, ak mesin kon wou näwäu ererwon.

4:1–12 Tesalonaika roasiret akan woiaka epar moin kiro sakau me rawaun Pol nukas sakau ämän awarowon.

4:13–5:11 Jisas ko ätäi koumoi, owosewarai kiro ämän Pol nukas awarowon.

5:12–22 Pol nukas Näwäu ko ätäi kowai rai awarowon.

5:23–28 Pol kon ämän erekapu patarwon.

¹ Is Pol, Sailas Timoti ori, ikes ak Anut nukan roasiret Tesalonaika mena rai jer we marom. Momonek Anut, pak iken Näwäu Jisas Krais mesin

akan woiaka epar me rai. Anut nukas kon wou näu oripas ak sarwareanik, akan woiaka päurar rawaun marai.

Tesalonaika menan roasiret ak akan woiaka epar momoi, rapor raiäi.

² Ik omre orip orip ak mesin ronkateanik, Anut aumoi, ko 'pere' auriäum.

³ Akan woiaka epar momoi, sarau sakau miäi. Akan woiakas jaunakat mesin meiemoi, sarau näwäu senes miäi. Ak akan woiaka sakau momoi, iken Näwäu, Jisas Krai ätäi kowai mesin kume raiäi, okon, ik akan onok kiro ronkateanik, iken momonek, Anut 'pere' auriäum.

⁴ O jaunokot, ik äpu, Anut nukas akanun wous meiemara, ak kon roasiret senes saräun sare marowon.

⁵ Ik Anut nukan Ämän Eposek ak awaraun oi potomun. Utianik, ik kiro ämän aremun kiro erar ämän wa, kiro ämän Osou Näu nukan sakau orip. Iken woiok kiro ämän mesin epar momun kiro ak ätär maromun. Ik ak pak raumoi, kiro onok ak sarwaraun kesermun.

⁶ Ak iken onok pak Näwäu nukan onok pak tainorin. Kesermana, ak usu sosop senes oin. Utianik, Osou Näus ak woiaka ereraun sakau aronuk, ak kiro ämän oin.

⁷ Keserna, woiaka epar moin roasiret ak Masedonia provins pak, Akaia provins pak rai akas akan onok eposek miäin aparianik, tainoriäi.

⁸ Akan woiaka Anut mesin epar moin, Näwäu nukan ämäni kanam jejep senek ak pakas karauk omsau erekapu potonuk, roin. Kiro ämän ak mesin Masedonia provins pak Akaia provins pak

karar potau wa, omsau erekapu pote iporwon. Keserianik, ik akan woiaka epar moin mesin kar ämän awarau senek wa.

⁹ Owon, ik ak pak pote raumun ses opok roasiret erekapu akas ak mesin keser äiäi, “Kiro roasiret akan ämän roianik, ak sät eitek jou miäin utomoi, rusapai epar eit jou mururai. Ak epar Anut awau rau nukar sarau karar mururai.

¹⁰ Ak kon Mokoi omar oikas kowaun rai kume rai.” Anut nukas kiro Mokoi meiewon ätai siräi mowon. Tawa Anut nukas kon kasak päun ses opok, roasiret onok aru miäi wasarewaronuk, kon mokoi, Jisas nukas ik woiok epar momun roasiret sareikeanik, imäikai.

2

Pol nuka Tesalonaika mena sarau mowon mesin äiewon.

¹ Iken jaunokot, ak äpu ik ak apwarau potomun ik kiro erar potau wa.

² Ik Tesalonaika mena potau wa opok, Filipai mena rauta rauta, kiro pakan roasiret akas ik usu sosop senes ikomoi, aru ämän aikoin, ak kiro onok äpu. Utianik, iken Anut nukas sareikemara, sakau ikowon. Ik Tesalonaika mena kouta, kos ik sareikonuk, aru roat akas ik aru mukauriäi ik iminewarau wa. Ik sakau tai raumoi, kon Ämän Eposek ak tamaromun.

³ Ik kiro ämän ak tamaromun, kiro iken ronkat pakas sepuk ämän ra, aru ämän ra awarau wa. Ik kar sät ämän ak atonwaraun keserau wa. Wa senes, wa.

⁴ Anut nukas kon Ämän Eposek araun aikiäu ik kiro ämän karar orip orip areäum. Meter kos iken

onok ate apaikianik, iken onok eposek äiewon, okon, kos ik Jisas nukan Ämän Eposek roasiret tamaraun sarau ikowon. Ik roasiret akan woiaka ereraun wa sarau miäüm, ik Anut nukan wou karar ereraun sarau miäüm. Anut nukas iken woiok jekur wasare apariäu.

⁵ Ak äpu iken ämänis ak raiaka atau wa. Ik akan osap owaun ämän mau wa. Anut ko owo onok ikes keseriäümun kiro ko äpu.

⁶ Ik kar ros iken enmok jou mukaun rai kiro sarau mau wa. Ik akas ra, karauk roasiret akas ra, iken enmok jou mukaun rai sarau mau wa.

⁷ Epar, ik Krais nukan ämän oi ariaum roat. Keseria, ik ak pak raianik, akas ik sareikaun sakau ämän awaraun itok, utianik, ik ak pak pote raianik, kar asires kon mokoit eteinanak kamware raiäu senek, ikes ak nais jekur kamware raumun.

⁸ Iken woiokos akanun meianik, ik woiok erer orip Jisas nukan Ämän Eposek tamaromun. Utianik, ik kiro onok karar mau wa, ik ak sarwaraun onok eposek nais kesermun, owon, iken woiokos akanun epar meieäüm.

⁹ Iken jaunokot, ik ak mesin sarau näwäu momun, ak äpu. Ik sanpeu, pututu Anut nukan Ämän Eposek tamaromoi, iken o kau maun karauk sarau nais miäümun. Keseria, ikes ak kar usu wa aromun.

¹⁰ Ik ak pak raumun ses opok, ik karauk onok aru ak opok mau wa, ik Anut nukan onok eposek karar tainori raumun. Keserta, kar ros ik onok aru momun äiäu senek itok wa. Iken onok kiro keseriäümun ak äpu. Anut nuka nais ko kiro onok äpu.

¹¹ Ak äpu kar ros kon mokoit jekur kamwareäu senek ikes nais ak roasiret karar karar jekur kamwareäumun.

¹² Ikes akan woiaka sakau mareanik, usu ämäiäun sakau aromoi, Anut nukan wou eraun kon onok eposek tainoraun sakau ämän awareäum. Anut nukas ak kon roasiret senes sare maromoi, ak enmak jou orip kon inkaruru rapor rawaun urwarowon.

¹³ Ak Anut nukan ämän roumana, tainorin, okon, ik Anut orip orip 'pere' auriäum. Ikes Anut nukan ämän ak siarakap oi koumun, ak roianik, kurte oin. Kiro kar ron ämän wa, utianik, kiro Anut nukan ämän. Kiro Anut nukan ämänis akan woiaka uru sarau monuk, akan woiaka epar moin.

¹⁴ O iken jaunokot, Anut nukan roasiret Judia provins opok Krajs Jisas pak pasar rai, ak usu oin senek, karauk roasiret akas nais ak opok keseriar keserin. Kiro roasiret akan jaunakat Juda akasar usu areäi senek, ak nais akan omsau pakan roat akasar usu aroin.

¹⁵ Kiro Juda roat akas Näwäu, Jisas wena, meiewon. Anut nukan ämän roianik, areain roat nais keseriar akwarona, meiein. Akas ik usu atap atap ikomoi, akan menan emeikona, manomun. Akas Anut nukan wou aru murianik, roasiret erekapu pak iwäi murateäi.

¹⁶ Ikes Anut nukan ämän karauk omsau pakan roasiret tamarta, Anut nukas ak imwarai rai, kiro Juda roat akas iken apu patiriäi. Kiro onok senek, rusapai akan onok aru sosop senes morai wa utiäi. Rusapai, Anut nukas kiro roat mesin kasak näwäu peu.

Pol ko ätäi Tesalonaika roasiret apwaraun ronkatewon.

¹⁷ Iken jaunokot, ik omre katunak ak utware manomun. Ik ak pak rawau wa, utianik, iken ronkat karar ak pak rau. Ik ak utware manomun, okon, ik ätäi ak pote apwaraun rai ronkat sosop ouram.

¹⁸ Ik ätäi ak rawa potauriäüm. Is Pol, is ak rawa orip orip ätäi potauriäim, utianik, Satan nukas iken apu patiriäu.

¹⁹ Tawa iken Näwäu, Jisas kowai ses opok, kos owo osap tawa oi koi ikai, kiro osap aka karar. Keseria, ik ak pak erek kon amukup tai raumoi, iken woiok ererai.

²⁰ Epar senes! Ak pakaima, iken enmok jou orip sareanik, iken woiok eposek sare mukiäi.

3

¹⁻² Keserna, ik ak apwarau potaun senek wa, okon, omre rumukäu kume rawaun utomoi, iken ronkat ik Atens näu mena ikarar raianik, Timoti äsimorta, ak rawa potowon. Ko iken amunok, ko Anut nukan sarau ro Krai nukan Ämän Eposek roasiret tamareäu. Kos ak rawa potomoi, akan woiaka epar moin sarwareanik, akan woiaka sakau maraun itok.

³ Kesernuk, ak usu sosop oianik, akan woiaka epar moin ätäi wa piriraiei. Ak äpu, ik kiro usu owaun Anut nukasar sare mukowon.

⁴ Ik ak pak raianik, ika opok usu sosop päi rai awareäumun. Ak äpu kiro onok epar senes rusapai peu.

⁵ Is omre rumukäu kume rawau senek wa, okon, is Timoti äsimorta, ak rawa potowon. Kos

akan woiaka epar moin kiro owo senek aparaun potowon. Isan ronkat, Satan nukas ak ate apwaronuk, iken sarau ak pak momun kiro erar sakaram, kiro onok aru.

Timoti nukas Tesalonaika roasiret sarwarowon ämän koi äiewon.

⁶ Utianik, Timoti ko ak pak rawonus, ko ik siarokop koumoi, ko ak mesin ämän eposek aikowon. Kos ak akan woiaka epar mianik, karauk roasiret mesin woiakas meieäi ämän koi mukowon. Ko kar ämän keser aikowon, akas orip orip woiaka erer orip ik mesin ronkateikianik, ik ätäi apaikaun rai ronkat sosop oiäi. Ikes nais keseriar ak apwaraun rai ronkateäum.

⁷ Iken jaunokot, ik usu sosop senes oiäum, sinuk, akan woiaka epar moin ämän eposek kis ik sakau mukiäu.

⁸ Rusapai, ik ak Năwău pak sakau pasar rain ämän roumoi, iken woiok ätäi nău sareu.

⁹ Rusapai, ik ak mesin Anut ‘pere’ auram. Ik akan onok eposek mesin ronkateanik, iken Anut nukan amukup woiok năwău ererianik, raiäum, okon, ko ‘pere’ auriäum.

¹⁰ Sanpeu pututu, ik ak mesin iken woiok sakau mianik, ak pote apwaraun Anut auriäum. Akan woiaka epar moin sakau wăpik sarenuk, ikes ätäi ak isanwareanik, sakau maraun Anut nais auriäum.

¹¹ Iken Momonek, Anut pak iken Năwău, Jisas pak awasar iken apu sare mukosa, ik ak rawa potam.

¹² Akas karauk roasiret mesin woiakas meieäi. Ikes Năwău aurtă, kos akan woiakas meieäi onok năwău senes sarăi. Kesernuk, ikes ak mesin iken

woiokos meieäu senek, akas nais akan jaunakat pak roasiret erekapu mesin pak akan woiakas mejäiei.

¹³ Ak kiro onok keserna, kos akan woiaka sakau marai. Kesernuk, tawa iken Năwău, Jisas ko kon roasiret nuka mesin akan woiaka epar moin nuka pak erek kouna, ak iken Momonek, Anut nukan amukup ämän wăpik, eposek rawaiei.

4

Ak onok eposek mona, Anut kon wou ererai.

¹ Iken jaunokot, iken ämän pataraun kesek ämän awaraurum. Ak iken onok eposek oin, kiro onok keseriar tainori arina, Anut nukan wou ererai. Ik äpu ak kiro onok rapor tainoriäi. Rusapai, ik Năwău, Jisas nukan enip pakas ak sakau ämän awarom, kiro onok raporiar tainorwe. Keseria, kiro onok eposek năwău saräi.

² Iken Năwău Jisas nukan sakau pakaima, ak owo onok keseraun ämän aromun, ak kiro äpu.

³ Anut nukan ronkat ak kon onok tainorianik, rapor tuku rawaun äiewon. Ak sapum onok maun wa ronkatău.

⁴ Ak roat karar karar akasar akan enmaksau jekur kumăun äpu maiei. Ak Anut nukan wou ereraun kon onok tainorianik, akan asiret pak eposek rawaiei.

⁵ Akan woiaka sirăianik, akan enmaksau oumoi, sepuk sepuk sapum onok wa mau. Karauk Airen roasiret ak Anut äpu wa, akas kiro onok keseriäi senek, ak wa keserau.

⁶ Kar ros kon Kristen jauk opok kiro onok aru wa mau. Ko kon jauk atonorianik, kon asir wa

imäi ariäu. Kar ros kiro onok aru keserai, Nāwäu nukas kiro ro tawa usu nāwäu senes nurai. Ik kiro sakau ämän meter awaromun, rusa nais ätäiar awarom.

⁷ Anut nukas ik sapum onok me rawaun urweikau wa, ik kon onok eposek me rawaun urweikowon.

⁸ Keseria, inok ro ko okoro ämän tainorau wa, ko ro nukan ämän sumkäinäu wa, ko Anut nukan ämän sumkäineu. Rowe, Anut nukas kon Osou Näu ak areäu.

⁹⁻¹⁰ Ikes ak akan jaunakat mesin woiakas meiäun rai, jer we marau wa. Ak äpu, Anut nukas akan jaunakat akanun woiakas meiäun onok ätär marowon, Epar senes! Akan onok kiro eposek, akan jaunakat erekapu Masedonia provins opok rai akas akanun woiakas meiäi. Utianik, ak kiro onok keseriar keserna, nāwäu saräun sakau awarom.

¹¹ Ak woiaka päurar rawaun sarau sakau moinai, akasar akan sarau atap atap jekuriar kamewe. Ak jaunakat akan sarau mesin wa aräu. Ak akan ipiakasar sarau mowe. Meter ikes ak kiro onok keseraun awaromun.

¹² Ak kiro onok keserna, karauk roasiret akan woiaka epar mau wa, akan onok aparianik, akan enmaka jou maraiei. Ak akan sarau jekur maiei. Ak keseraiei, ak karauk osap mesin karauk roasiret wa awaraiei.

Nāwäu nuka ätäi kowai.

¹³ O iken jaunokot, owo onok woiaka epar moin roasiret meiein opok päi ak äpu maun ik kiro ämän awaraurum. Karauk roasiret ak Jisas mesin woiaka epar mau wa, osap eposek päun kame

rawau wa, ak ro meiäi ses opok, akan woiaka aru miäi. Ik kiro ämän awaraurum roianik, akan onok wa tainoraiei.

¹⁴ Ik Jisas ko meieanik, ätäi siräiewon mesin woiok epar mom. Keseria, ik äpu, woiaka epar moin roasiret meiein ak Anut nukas Jisas pak erek ätäi imwarai.

¹⁵ Ik rusapai Năwău nukan ämän tamukowon awaraurum. Kiro Năwău nuka ätäi kowai omre opok, ik roasiret omnokou opok awau raum amke wa potam. Meiein roasiret akas amke siräiaiei.

¹⁶ Rowe, Anut nukan sarau eitek akan năwăus sakau ur wenuk, Anut nukan pupu ur rowam. Kiro ses opok, Năwău nuka ätäi omar oikas kowai. Roasiret ak akan woiaka Krais mesin epar mianik, meiein, ak amke siräianik, ätäi awau rawaiei.

¹⁷ Keserna, ik rusapai okoro omnokou opok awau raum, ik kiro roasiret pak erek tururmoi, iou uruas Năwău omar oik tararaun tonam. Keseria, ik Năwău pak orip orip rawam.

¹⁸ Keserianik, ak akan jaunakat akan woiaka sakau maraun okoro ämän awaraiei.

5

Năwău nuka ätäi kowai, okon, ak sakau tai rawe.

¹ O jaunokot, owo omre kiro onok päi, owo ses kiro onok päi, ik kiro mesin ak wa jer we maram.

² Ak äpu, Năwău nukan kowaun omre kiro pău roat akas pututu osap pău oiäi senek keser kowai.

³ Roasiret ak keser äiaiei, “Rusapai omre eposek ik rapor raum.” Keser äi rauna rauna, usu năwău ak rawa kurte koumoi, aru marai. Kiro usu kar

asir amaiwo orip mokoi an jowaun kurte tätäi oiäü senek, ak kesek usu kurte owaiei. Ak kiro usu ute imine manau senek wa.

⁴ Utianik, jaunokot, ak pututu rawau wa. Keseria, kiro omre nukas päu ro senek koianik, ak wa atonwarai.

⁵ Ak erekapu ak sanpewan roasiret, ak arou merek opokan. Ik pututuan roasiret wa, ik kukuman pakan wa.

⁶ Kesermoi, ik karauk roasiret nini raiäi senek wa rawau. Ik siräi raumoi, iken ronkat ikasar jekur kumäü.

⁷ Niniäi roasiret ak pututu niniäi. Roat an sakau jeäi kiro ak pututu raiaka käiäü.

⁸ Utianik, ik sanpewan, okon, ikasar iken ronkat jekur kumäü. Ik iken woiok epar mianik, iken jaunokot mesin iken woiokos meieäüm, kiro onokus ik sareikaun ain siot senek miäüm. Iken ronkat Näwäü nukas ätäi koi imäikai kiro onok iken at kapa senek kureäüm.

⁹ Anut ko kasak peanik, usu ikaun sare mukau wa. Kos iken Näwäü, Jisas Kraiis pakas imäikaun sare mukowon.

¹⁰ Jisas ko ik mesin meiewon, okon, ik awau rawam ra, meiam ra, ik ko pak erek rawam.

¹¹ Keseria, ak akan jaunakat karar karar okoro ämän awareanik, akan woiaka sakau maraun sarwaraiei. Kiro onok rusapai keseriäi senek keseriar keseraiei.

Pol nukas kon ämän patarwon.

¹² O jaunokot, ik kar ämän awaraurum. Karauk roat ak kamuk Näwäü nukan sarau morai. Ak akan ämän jekur roumoi, tainoraiei, owon,

Näwäw nukas kiro roat ak kamwareanik, tama-raun sare marowon.

¹³ Ak kiro roat akan sarau mesin ronkatemoi, akan woiakas akanun meieanik, akan ämän tain-oraiei. Ak akan jaunakat pak päurar tämuräi rawaiei.

¹⁴ Iken jaunokot, ik ak kiro ämän awarom. Karauk roasiret ak sarau mau wa, sarau maun sakau awaraiei. Inok roasir iminäi, akas kon wou sakau muraun auraiei. Roasiret ak sakau wäpik, akas sarwaraiei. Ak roasiret erekapu mesin woiakati mareanik, päurar päurar sarwaraiei.

¹⁵ Karauk roasiret akas ak opok onok aru mona rai, akas ätäi onok aru wa marau. Utianik, omre orip orip ak roasiret karar karar opok onok eposek maun keseraiei. Akan jaunakat pak karauk roasiret erekapu opok kiro onok eposek nais kir keseraiei.

¹⁶ Ak orip orip woiaka erer orip rawe.

¹⁷ Ak orip orip Anut aurwe.

¹⁸ Owo onok eposek ra, aru ra, ak opok penuk, ak orip orip Anut 'pere' auraiei. Owon, Anut nukas ak roasiret Krai Jisas pak pasar rai, kiro onok tainoraun sare marowon.

¹⁹ Osou Näus akan woiaka uru sarau maun keseriäu, ak kon sarau wa tämurau.

²⁰ Osou Näus karauk roat sarwarnuk, akas Anut nukan ämän miäi, ak kiro ämän sauk wa mau.

²¹⁻²² Ak karauk roasiret akan onok pak akan ämän erekapu pak wasare aparnai, owo onok eposek kiro sakau atowe, owo onok aru kiro erekapu utowe.

²³ Is Anut keser aurim, ko iken woiok päurar rawaun keseriäu, keserai, kosar akan

osou, totomaka, enmaksau, erekapu eposek kamwaronuk, ak kon onok tainorianik, iken Năwău, Jisas Krais kowai ses opok, ak ămăn orip wa rawaiei.

²⁴ Anut nukas ak urwarowon, ko kon ămăn orip orip tainoriău, okon, ko kiro onok keseraun äiewon epar keserai.

²⁵ O jaunokot, ak ik sareikaun mesin Anut aurwe.

²⁶ Roasiret akan woiaka Jisas mesin epar moin akan ipiaka atotemoi, isan 'pere' ămăn awaraiei.

²⁷ Is Năwău nukan amukup ak sakau ămăn awarom, kiro jer ak Kristen jaunakat erekapu ninare maraiei.

²⁸ Iken Năwău, Jisas Krais nukas kon wou nău oripas ak sarwarmoi, ak pak rawai.

Anut nukan Ämän Eposek
The New Testament in the Girawa Language of Papua
New Guinea
Nupela Testamen long tokples Girawa long Niugini

copyright © 1994 Wycliffe Bible Translators, Inc.

Language: Girawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Mar 2025 from source files dated 31 Aug 2023

857654ed-60eb-5741-bcea-dd5397d3f069